



SIPA izvela akciju Varda

Otkrivena laboratorija marihuane

U tri odvojene policijske akcije koje su izvedene na području četiri grada uhapšene su četiri osobe

U tri policijske akcije koje su izvedene tokom protekla dva dana na nekoliko lokacija u četiri bh. grada uhapšeno je nekoliko osoba, te je zaplijenjena određena količina droge. U akciji nazvanoj Varda, koju su na području Foče i Višegrada izveli pripadnici Agencije za istrage i zaštitu BiH (SIPA), uhapšene su dvije osobe osumnjičene za krivično djelo neovlaštena proizvodnja i promet opojnih droga, te je otkrivena laboratorija za uzgoj marihuane.

Kako je saopćeno iz SIPA, tokom akcije je, po naredbi Osnovnog suda u Višegradu, pretreseno nekoliko lokacija na području Foče i Višegrada.

Tom prilikom kod osumnjičenih su pronađeni i oduzeti oprema i materijal za uzgoj i proizvodnju marihuane i

to lampe, posude, ventilacija, grijači, šest stabljika konoplje i dva mobitela. Pronađeni predmeti i tragovi će se koristiti kao dokaz u krivičnom postupku, saopćeno je iz SIPA, gdje dodaju da će osumnjičeni dvojac nakon ispitivanja biti predat postupajućem tužitelju na dalje postupanje.

U sklopu akcije Megan, koju su izveli pripadnici dobojske policije, uhapšen je B. T. (1986) iz Doboja. U ovoj akciji policajci su oduzeli određene količine marihuane, spida i kokaina. Osumnjičenom je dobojski Osnovni sud odredio jednomjesečni pritvor.

Treća akcija je izvedena na području Bosanske Krupe gdje su kod R. M. pronađeni droga kanabis i kuhinjski nož.

A. B. Č.